

四庫全書

集部

欽定四庫全書

元音卷八

陳旅

字衆仲
莆田人

述懷三首

雨過中夜涼殘月在林麓有懷不能寐起步松徑曲百
川日東注何以洗流俗長河在天上手短不可掬

君子貴聞道道在天地中天道不能言聖言宣帝衷六
經本易簡小智紛研窮我愛陶元亮有如諸葛公讀書

不甚解乃欲大義通世儒不知此白首箋魚蟲一旦臨
大事倉皇竟無功

漢法賈人賤衣服禁繡綺當時販繒革赤鞞亦累累項
羽圍滎陽漢帝脫九死云何戶牖公持此以為市平世
多人才倉卒誰可倚我思魯仲連仲連天下士

郭孝子詩

金臺有孝子郭氏名壽瑛壽瑛執親喪晝夜聞哭聲負
土起崇塚栽松翳玄扃瘦骨寒岳立苦淚春河傾視容

日梅梅一朝廢雙睛復扶大母柩冥行出蕪城願言畢
序葬身瘞心則寧里人問孝子過毀聖所懲孝子哭且
答我非敢傷生有淚不哭親惡乎用吾情親死我目在
徒能視無形黃泉相見日無用此目明吾聞壽瑛語悲
愴不自勝昔人曾有言五色令目盲長年悅芬華眉斧
戕心精視此郭孝子媿色能無頽而我嗜讀書昏花散
秋燈思親不能哭涕泗空填膺

為趙敬叔賦漢海獸蒲桃鏡蓋鄭夾漈家故物

也

尚方老冶收精銅金膏玉髓開腫膿未央曉月低青桐
六宮秋井生芙蓉當塗妖鬼負神器銅人登車數行淚
空奩偶落長安市來與人間照珠翠凝陰空祭江心龍
海雨夜入閩王宮一朝愁殺滌上翁破屋日夜穿晴虹
西苑野露堪作酒中有陶駘活欲走趙侯得之莫失手
龍女蛟童俟之久

此鏡得於火滌
之孫鄭子經

題白玉蟾贈劉丹晨暑月詩後

玉蟾先生列仙儒
夙昔夢見冰雪如
丹晨不比劉師復
彌明本解人間書
紫清午榻松陰冷
俯視塵寰真火井
銀河夜靜淡明月
水風吹落玄雲影
玄雲盤屈龍虎章
百神守之不敢將

南山

江左羣山圓仙丘
倚太霞上清分亢
爽南國抱磬研臺
觀黃瓊宅林巒赤
斧家天池開寶鑑
日井射金沙桂賈
秋巖栗桃烘曉岸
葩泉香通美竹雲
液漱靈芽俯澗松

偏潤緣崖逕自斜幽亭宜水遠晴閣受嵐遮神烏丹局
秘玄關紫氣賒石橋留月色銀浦渺星華願解延陵劍
終乘博望槎臨風一邂逅食我棗如瓜

袁克中求母得之泉州

母子忽相見睽離已廿年此時歌大隧昔日賦寒泉歲
晚安仁養平生絡秀賢清朝崇孝治得就使車還

艾氏心遠樓

聞子臨川上高樓萬里并興來時獨立心與日俱行野

夕歸鴻小溪晴落水明登臨何日共作賦寫平生

題羅稚川畫卷

雨氣通林壑江光動野航道人巖下去草屋樹邊涼斷
岸入秋水遠山留夕陽登臨莫作賦游子未還鄉

送張真人代祀武當龍虎兩山

桂館祠官持羽節名山兩地躡丹梯共誇曼倩來金馬
大勝王褒祀碧鷄杵碪暝痕消雨石杼巖秋影動星溪
蕙肴椒醑登瑤席定有神光起時畦

遊福州冲虛觀用壁間韻

力士持兵守絳宮，吹笙人去斗壇空。
白榆城闕秋雲上，紅樹樓臺夕照中。
鴻寶昔疑丹穴謬，龜泉今悟玉池通。
他年不跨芝田鶴，曾向冲虛學馭風。

送張御史之南臺

關中鳴道張夫子，今見聞孫玉雪標。
白簡秋霜清瘴海，繡衣春日拂雲霄。
何人江浦歌桃葉，有客都門折柳條。
我欲買舟尋太白，鳳臺涼吹晚蕭蕭。

林外詩爲夏生作

幽人遯世入林間
林外高風況可攀
仲御偶然遊洛水
黃公豈必在商山
春深溪雨流花出
日暮松雲載鶴還
落拓塵中嗟我老
歸歟無地可投閒

懷慶王節婦

良人飄泊渺煙鴻
窓竹寒沾雨淚紅
檜楫不遊淇水上
栢舟仍見衛風中
龜文屈曲秋機斷
鷺影低回曉鏡空
贏得名公寫桓表
千年光燄吐晴虹

壽虞先生

先生生時其外祖夢衡山道士

衡山道士駐飛車千載儒宗出相家
月下華星垂五色人間珠樹吐三花
芝田養鶴春凝乳菡石聽鶯曉賜霞
朝退日長賓客醉翠房文火伏丹砂

送聶韞夫同知平江州

玉堂親見擢高科翦翦宮花染賜羅
驄馬總穿燕市柳高帆仍對洞庭波
董生學問傳三策屈子文章擅九歌
澤國政成應趣召殺青未覺得人多

爲張壺洲賦壺洲

握日臺高雨氣收扶桑涼影動瀛洲
珠林錯落三華露寶稼離羅五色秋
鄰曲夜機鮫有室空中煙市蜃爲樓
頗聞雲錦張高士曾與壺公汗漫游

院中聞大駕先還再和伯脩韻

甘泉宴罷鴈聲寒桂樹吹香出寶闌
翠輦遙臨秋海闊霓旌高拂曙星殘
毘城家拜銀麝賜棘院人爭繡虎看
堪笑子雲能作賦獨騎羸馬後奚官

送毛真人南還

真人不似壺丘子老去都忘杜德機
左乙象文令虎守上方鳬舄背人飛
巖扉暖翠侵緇帙江渚晴霞上羽衣
遊子故園春似海客窗長日聽催歸

送王致道代祀北岳北海濟瀆南鎮

皇帝齋明守鎮圭祠官奉節出金闕
北尋海瀆瞻恒岳南涉江淮上會稽
山下靈風吹桂權雲邊仙樹拂丹梯
王褒空有甘泉頌投老還鄉祀碧鷄

壽吳宗師

晚號看雲道人

九朝冠珮泰階平國有儒仙作上卿
碧海宵晴迎日出黃庭春暖看雲生
竹間自洗金鵝蕊花外長留翠鳳旌
莫學華陽貞白老乞身神武聽吹笙

與陳敬初同舟北游題餞行卷後

我愛天台陳敬初少日辭家即遠圖
上書可擬賈生策入關便棄終軍繻
八月官河秋水大三江親舍暮雲孤
名成歸去歲未晚卜隣有約依東吳

題木齋卷

昔年種樹不勝巢老幹今如屋脊高屢許徂公分橡栗
時呼木客醉松醪衣巾白日沾蒼雪枕簟西風夢海濤
歲晚淹留吾倦矣借君叢桂續離騷

元宵懷錢唐

武帝親祠太乙神流光洶旭動星辰竹宮典禮猶存漢
軹道山河已易秦香徑至今啼木客露盤無復泣金人
紅燈幾點東風裏猶是元宵一度春

和康庸田魯瞻公言懷韻

震澤三江入堰豬今年春雨又生魚漢廷數有寬租詔
魯史元無告糴書溝洫已非神禹跡東南空引白公渠
袖中夙有匡衡疏也儼金門候屬車

江城即事

江城十日九風雨騎馬出門行紫苔春草綠時猶作客
雲山多處忽登臺青青野竹題詩去小小吳姬喚酒來
漠漠候車乘早發城東昨夜杏花開

送董尊師

羽衣使者青旄節玉案函封紫水泥朝佩定從花外散
天香只向袖中攜暫憐方朔辭金馬終勝王褒祀碧鷄
龍虎壇邊銀渚近歸槎還傍露盤低

送宜黃劉縣尹

寶劒妝成即遠遊郎心何似妾心憂茜裙香濕芙蓉雨
翠袖涼生薜荔秋江北長愁寧殢酒周南多病莫登樓
海門潮落江瑤美能把千金買越舟

送李彥方閩憲副使

海邦赤子窮無告
詔遣儒臣著繡衣
天祿閣中書灝灝
越王山下馬駢駢
魚風滿港榕陰合
燕雨侵簾荔子肥
一道澄清俄頃事
使星還向紫垣飛

送李盤中真人代祀江南三名山

弱水回風不受帆
三山只在大江南
使槎真帶秋星濕
仙掌遙分夕露甘
瑄玉禮神通景氣
寶香隨地結晴嵐
泰壇建論昭靈貺
老我猶能效史談

送趙子期使交趾

曉日承恩紫殿深，都門祖道馬駸駸。
上書不奏唐蒙策，歸橐寧將陸賈金。
露入珠盤鮫室白，苔生銅柱象崖陰。
爲君臨水歌黃鵠，天北天南萬里心。

題班婕妤題扇圖

層城柘館重徘徊，坐見瑤階長綠苔。
紈扇秋來定無用，君王方築避風臺。

題羅節婦傳後

羅氏夫貶海上，有強之爲妻者，遂自經。

歲晚良人去未歸堂前有客著新衣此身只爲韓憑死
化作鴛鴦海上飛

趙吳興墨蘭

江南三月多芳草綠葉連娟映紫莖憶昔艤舟召雲上
一汀香雨入琴清

趙氏人馬圖

蒲桃宮前白面馬春日賜與近臣歸主人愛馬不換妾
更與小奴裁綠衣

白畫眉圖

隋家宮妓掃長蛾
消盡波斯百斛螺
化作雪禽春樹頂
遠山無數奈愁何

風竹圖

湘江風捲白頭波
北渚雲深帝子過
欲采瓊芳渡江去
翠衫輕薄曉寒多

題水仙花

莫信陳王賦洛神
凌波那得更生塵
水香月影空清處

畱得當年解珮人

賦凝春小隱

一窗花氣襲人衣
窗底芳塵煖不飛
坐久硯池生石雨
海棠枝上雪都稀

題虞先生詞後

憶昔奎章學士家
夜吹瓊琯泛春霞
先生歸卧江南雨
誰爲掀簾看杏花

傅若金

字與礪
新喻人

經采石

未明發蕪湖終飯次采石大江天同瀉巨浪山與敵松
寒蒼虬姿崖古老鐵色其傍有仙塚云是李太白生爲
長庚精沒爲大塊跡因思開元中出入蒙帝澤御羹白
瑤杯宮研青玉滴恩榮日深重意氣何赫奕酣歌太華
小豪飲渤澥窄頗聞宮中怒遂有天上謫殷亂微子行
楚昏屈原斥嗟哉唐家帝同姓逝安適何年爲茲遊千
載但故跡騎鯨信縹緲捉月詎昏惑得非厭塵羈無乃

達寄客翻然委之去富貴何足惜杜陵平生友夢寐頻
見憶白骨焉所求青山亦岑寂相去嗟已遠令人心悲
塞舉杯欲酌之帆去招不得

清露軒

秋氣集太虛夕光溥高樹時聞陰液墜暗識商飈度旄
旄星動林英英月霏霧涼局息塵想幽琴寄玄晤寂歷
松上聲逍遙丘中趣釣天澹斜景銀河暖微素古調今
所希大音誰能喻仙人飲沆瀣壽僉金石固千歲不可

期空歌徒延慕

雜詩二首

植蘭彌九畹種菊被三徑幽芳固殊姿馨香良可並
寒蘭以爲美食菊以資命晷言理蕪穢恒使枝葉淨蕪穢
苦易侵枝葉若不盛豈無桃與李貴此諧野性

窮巷有畸人夙夜勤古道弊衣適至骭疏食恒不飽
歌聲若金石顏色終歲好豈無當世念所趨惡佻巧美玉
不足珍懷義以爲寶

仇工部古松歌

蒼松在山自竒古灌木翳之人不驚忽然圖向堂上壁
滿座歎息長風生交柯崛起森畫晦其下將疑鬼神會
霧雨寒霏虎豹毛雷霆怒拆蛟龍背乃知巨筆老且神
力幹造化雄千鈞皇天不天棟梁具后土潛回霜雪春
爾松已爲人愛惜見爾爲爾生顏色山中豈無材木倚
絕壁未逢匠石嗟何益

方積混沌石行

混沌以來不可數萬八千歲生盤古氤氲乃在卷石間
光怪潛通落星渚來從魚復人盡訝坐念武侯心獨苦
八陣圖成泣鬼神三江石轉凋寒暑蒼波噴浸圓且堅
鷄子結形生理全久當化鳥非爲怪大未成羊亦欲仙
玉精隱月相照射金液流霞紛繞纏輕清已判中黃外
元氣猶含太素前英雄事往唯存石天衡地軸今徒識
江上常疑霧雨寒座中歛近風雷擊摩挲真如見溟滓
位置豈肯同沙礫長路相將拂劒隨天陰勿使精靈得

四月十八日壽陳都事四十韻

種德由來遠流芳信有苗名門多令器夫子最高標地
迴瞻嵩岳天清見斗杓聲名從結髮問學自垂髫江漢
栖遲久林亭興致饒紫蘭依月露蒼竹倚風颭畫艇移
書放秋燈把劍挑微名寧屑屑高志獨囂囂五氣乘昌
運羣英集聖朝武功收赫怒文治付宣昭厯數初過禹
聰明已贊堯求賢當晏食夢帝起中宵石室仍高隱金
臺歛見招賜書懸日月乘傳出雲霄議論紆三顧榮名

動百僚入宮催護璽趨府聽鳴鑣郊杜陳周禮神人協
舜韶出關春衣繡分陝夜乘輶獬觸心彌壯豺吞膽共
銷封章猶懇切歸思遽飄飄袞職江湖隔鋒車道路遙
凝旒思穆穆行李發蕭蕭典祀尊原廟承釐洽大寥步
依文石進香近黼裳飄白日明驄馬清霜急皂鵬帝裾
遮道引諫草避人燒佐省持三尺繩民究八條兵曹豐
暇豫郎位益崇超所向才華冠何曾意氣驕臺評推妙
畫士望懃深翹引拔連茅茹芬芳雜桂椒銀章看且佩

金鼎竟須調小草方慚出浮萍久恨漂文章殊豹隱篆
刻近蟲雕徐穉矜懸榻蘇秦惜弊貂敢期充砥礪猶幸
致芻蕘黃鵠追高舉青松托後凋火行占孟月星聚識
生朝壽酒開雲液仙音出鳳簫祇應成遠業未可慕松
喬

蘇授經進講明仁殿賜宴有作次韻

聖明思善述耆舊倚交修虎豹開閭闔山龍照冕旒日
臨丹宸動雲拂翠華流獻納稽前古都俞協大猷几筵

花氣合圖史竹光浮當宁經綸遠尊賢禮數優內厨深
出饌西苑近回舟禁臠由來貴溪毛庶可羞遙勤三顧
問各奉萬年酬牢落南州客相望奈九秋

七夕

耿耿玉京夜迢迢銀漢流影斜烏鵲樹光隱鳳凰樓雲
錦虛張月星房冷閉秋遙憐天帝子辛苦曾牽牛

中秋有感二首

日夜瞻鑾駕生靈係聖躬都門一騎至血淚萬行紅桂

月虛秋殿梧雲冷暮宮孤臣重北望掩袖立西風

翠華游幸地悵望感清塵洒竹啼宮女持弓泣野臣金
盤殘月露玉座倚星辰獨有龍鸞氣長令草木春

桃源圖

聞說避秦地花開忘歲年偶逢漁父問長使世人傳丘
壑渾疑幻林廬或近仙至今圖畫裏惆悵武陵船

憑高

世祖初開業安南早貢琛國蟠螭角小地接犬牙深使

節猶頻入蠻兵莫見侵數州須拯恤萬感寄登臨

韓淮陰廟

淮陰千古英雄恨楚樹荒荒夕照殘水夾廢城春草合
雲昏遺廟野花寒封齊安用真王印興漢空遺大將壇
高帝旌旗俱寂寞斷碑零落後人看

秋興五首

天上旌旗捲暮寒人間鼓角送悲酸瑤池落日迴青鳥
月殿浮雲掩素鸞楊柳漸稀風瑟瑟芙蓉已老露溥溥

砧聲苦近南隣客寥落羈懷強自寬

落木蕭蕭滿帝畿
候蟲處處趣寒機
客星入斗秋深見
神女行雲日晏歸
復喜諸公扶社稷
只憐弱弟奉庭闈
短章諷罷頻回首
目送江南鴻鴈飛

梧桐樹晚細含煙
閭闔門深搃映天
龍去鼎湖雲漠漠
鶴鳴華表月娟娟
東都日望金輿發
南徼猶驚羽檄傳
只在忠良勤夙夜
五陵佳氣故依然

白日遙看錦繡懸
重重樓閣隱青煙
化城或在諸天外

方丈長疑積水邊每說神僧飛杖錫更聞童女上樓船
西風日暮何蕭瑟一度登高一惘然

弊裘已畏早寒侵歲月祗驚久客心莫倚長卿能作賦
始知季子故多金天門守虎星辰冷雲氣從龍霧雨深
直北關山時極目背人聊復短長吟

崇天門朝賀

輦路塵清列羽林侍臣星嚮肅森森風含鳳吹青冥閣
日射龍旗紫極深兩廡佩趨臨水玉九門詔出映泥金

從來湯武須傳業更在伊周老盡心

送唐子華赴嘉興

聞君秋思滿南湖行李今晨發帝都
幙府初乘從事馬江城還憶步兵鱸
樹浮白日山侵越潮蹴青天海入吳
閒暇憑高動詩興須成一醉掃新圖

和危山臞寄弟二首

畫戟連雲甲第高內官如雨送春醪
貢金半鑄分封印賜錦多裁侍宴袍
自古聖明非獨治只今才武係相遭

文章且共安徽命廊廟由來錄舊勞

故園兄弟摠相思久客懷歸屢失期
司馬却慙題柱早東方翻恨上書遲
都門柳暗愁中見鄉國花繁別後知
昨日南橋放春水望雲回首獨多時

題書船入蜀圖送夔州教黃尚質

楚客之官泛蜀船畫圖盈尺見山川
九江樹色瀟湘外三峽猿聲灩澦前
方譯漸通巴俗語國書新絕漢人傳
豈無好事能攜酒問字時時集講筵

歸舟阻風

洞庭十日風勢號沙頭客舟如繫匏沅湘九道白波立
衡霍千峯雲霧交神蛟欲蛰無定窟黃鵠將歸愁故巢
咫尺城樓不得上何由一望楚江郊

王氏相師山莊

相師之山雲杳冥千崖萬壑倚空青上方雷雨藏天井
南極風煙落洞庭溪客去迷花藹藹野人居愛竹泠泠
何時遂買登山屐乘興還來扣石扃

書南寧驛

歲晚驅馳憶帝京
北風回首重關情
中天日月迴金闕
南極星辰繞玉衡
父老尚煩司馬檄
蠻夷須用伏波兵
也知文德能柔遠
傳道新恩欲罷征

高明樓

江上孤城暎水迴
市中曾搆出塵開
衡廬樹入青天盡
章貢波翻白日來
每愛陳登門有客
最傳王粲賦多才
闌干百尺應能借
乘興誰同月下杯

題天使館

元統三年頒正朔詔書還到極南開使旌入館青雲動
仙蓋臨江白日迴諭蜀豈勞司馬檄朝周終見越裳來
還家耆舊應相問文化如今遍九垓

却侍姬

夜宿安南天使館主人供帳爛相輝寶香燼起風過席
銀燭花偏月照幃王母謾勞青鳥至文簫先放綵鸞歸
書生自是心如鐵莫遣行雲亂濕衣

登樓

樓上秋風吹畫屏
樓前秋思滿都亭
金河水去涓涓碧
瓊島雲來冉冉青
近見蕭何成第宅
舊聞汲黯在朝廷
明時進用多英傑
迂腐深慙守一經

題張齊公祠

將軍結髮事先朝
百戰山河血未銷
總說霽雲多慷慨
兼聞去病最嫖姚
煙塵劍戟迷秋峒
風雨旌旗落暮潮
自古英雄須廟食
精靈何待楚詞招

過故妻墓

相臯煙草綠紛紛
洒淚東風憶細君
每恨姮娥工八月
虛疑神女解爲雲
花陰午坐閒金剪
竹裏春愁冷翠裙
畱得舊時殘錦在
傷心不忍讀回文

汴梁

汴上荒城繞故宮
山頭危石墮秋風
夷門市起聞嘶馬
梁苑樵歸見斷鴻
闕草尚餘殘後碧
進花無復盛時紅
欲登高處腸先斷
滿目閒愁賦未工

洞庭連天樓

崔嵬古廟壓危沙
縹緲飛樓入斷霞
南極千峯迷楚越
西江衆水混渝巴
鮫人夜出風低草
龍女春還雨濕花
北倚闌干望京國
故人何處認星槎

鳳凰臺

太白題詩鳳游處
古臺蕭索換流年
風流偶出齊梁後
文藻猶含晉宋前
淮水夜明滄海月
石城春暗秣陵煙
古來宮殿俱無跡
風雨憑闌思黯然

寄鄂季弟幼霖并寄仲弟次舟

吾親霜鬢日紛紛爲客艱難不使聞養老只須常善飯
生兒何必總能文書同洛下思黃耳心似河陽見白雲
季弟還家報兄好歸期猶恐過春分

送姚子微

雙闕除書上玉階三湘回櫂拂冰崖天垂銅柱南低海
地入金陵北近淮江國鴈來秋肅肅驛樓雞動曉咭咭
大家定有東征賦鮭菜隨船慰老懷

送杜德常西臺御史

御史才華舊省郎
翩翩雲路起鵷行
天迴紫閣明奎壁
地切烏臺動雪霜
分陝定存周禮樂
過秦猶有漢文章
欲因巡郡還搜訪
別酒臨風意獨長

登岳

萬壑千峯次第開
祝融最上氣崔嵬
九江水盡荆揚去
百粵山連翼軫來
入樹恐侵玄帝宅
牽蘿思上赤靈臺
明年更擬尋春興
應及瀟湘鴈北回

送趙仲禮御史

文章御史久爲郎南赴金陵道路長
百粵雲山連楚大
六朝煙樹入隋荒
清秋按部行
驄馬落日登臺詠鳳皇
新喜諸公振風采
早聞當道去豺狼

送盧茂實之廣東憲幙

仙城近接衆山迴
憲府遙臨百粵開
海上喜通持節使
幙中兼得濟時材
鮫宮織罷魚龍出
蜃戶珠還蚌蛤來
預想到官多暇日
清詩題遍嶺頭梅

和余太守對雪見懷

江雪寒連驛樹遙，鶴裘清坐聽蕭蕭。
中天月避光芒合，南國雲含瘴癘消。
因憶石田春種玉，乍疑銀漢夕通橋。
使君辛苦迎驄馬，也念幽居寄閨寥。

岳陽中秋值安南貢使因懷舊遊

洞庭秋氣滿龍堆，爲客偏驚節敘催。
鐵笛乍聞雲外響，瓊樓應傍月中開。
越裳重譯三年至，溟海浮槎八月來。
忽憶舊遊今萬里，天涯長見鴈飛回。

壽王左丞

南極諸星暎赤霄東風二月滿青條焚香鳳閣春開宴
鳴玉龍墀午散朝但使經綸齊稷契不勞服食慕松喬
日長自度昇平曲閒聽雲間合九韶

柳貫

字道傳東陽人江西提學

度居庸關

居庸朔方塞始入兩崖張行行轉石角細路縈澗岡層
壑倒天影半林漏晨光崎嶇里四十所歷萬羊腸千轅

絡前後兩軌通中央谷開稍夷曠在險獲康莊豈惟遂
生聚列廛參雁行激流或機磴架广亦僧坊我生山水
窟愛此不能忘是日新雨已浮嵐亂沾裳水聲與石鬪
風飄韻清商跼轡不知高浮雲翼超驤考牒曩有聞經
途今始詳緬維古塞北八州猶漢疆控扼識形勢會同
知樂康屬茲景運開六服連綏荒兩京備巡幸離宮爰
相望守岳將考制如祠匪求样式瞻龍德中足徵王業
昌請繼王會圖勿賡新招章

李老谷聞子規

老杜聞子規近在東西川猶云感時物收淚寫幽悵今
我行塞徼子規相後先時夏雲景晦鳥呼搖空煙響入
樹窅窅啼垂血濺濺想知歧路難不恤軀命全千聲復
萬聲喚我歸言遄苟非木石心豈免腸內煎江南叢薄
間有花名杜鵑開時是鳥至相戒治春田不歸如江水
負此今五年風土孰云異物情要有遷寄巢勿浪出祝
爾還自憐嚴程趣行邁且復揮吾鞭

和袁集賢上都雜詩十首

出塞行瞻日趨朝喜近天
離宮開苑圃馳道絕風煙
瑤水巡非遠峒山厯更綿
甘泉多法從獻賦憶當年

雨水漸衣黑雲沙際目黃煙
開才黯慘日出已蒼涼
徇俗高檐帽清心小篆香
端居萬里念蕙草惜微芳

昔建寧中業初開徼外山
雉城平兀兀沙水淨灣灣
朱夏宸游正清秋武衛間
叨陪文學乘空愧髣毛斑

謠俗隨方異溝途隔舍迷
醺人惟馬漣勸客有駝蹄
殿

角孤花靚城隅雜樹低天涯中夜舞如意昔曾攜

天潢猶白白雲幙故青青積潦推車軸高風墮箭翎宮
塗丹赭堊殿戶紫金釘女樂蓬萊秘哀簫動杳冥

幄殿層雲障轅門積雪峰奇鷹皆戴角御馬盡飛龍瀚
海將臨幸云亭望陟封青丘大羽獵有事待玄冬

曹務唯章句官規自法程齋扉侵雨潤宴几得風清歷
厯三刀夢行行萬里城明年遂耕隱深仗酒爲名

經遊還絕塞際遇復清朝大暑無蒙俗輕寒已御貂盤

空齏屢薦觴至酒頻澆貧病諳爲客何慚帶減腰

公子青絲轡王孫綠幘車宴酣風小定舞破日西斜手
擲宮中果神行海上查築鄱無自厚儉德不期奢

水草方方善弓弧戶戶便合圍連婦女從戎到曾玄雪
毳千家帳冰瓢百眼泉浚稽山更比長望斗光懸

觀錫喇鄂爾多御宴回

毳幙承空柱繡楣綵繩亘地掣文霓辰旗忽動祠光下
甲帳徐開殿影齊芍藥名花圍簇坐蒲萄法酒拆封泥

御前賜酺千官醉忽覺中天雨露低

八月二日大駕北巡將校獵於賽音布拉克詔

免漢官扈從南旋有期喜而成詠

天子龍飛啓聖時乾坤開闢再清夷幸從在鎬承周宴
重喜臨邊舉漢儀御宿常時嚴虎衛吉行惟日望鸞旗
詔恩許免陪驂乘却愧長楊賦未奇

次韻元日預宴大安閣下

金殿開扉日映樞翠帷香霧動流蘇玉壺脩幹雙龍捧

寶座重栖瑞鵲敷春色入杯初漱灩雪光浮棟尚糝糊
天元啓運三陽正需宴欣承湛露濡

過長城

道德藩墉億萬年長城謾與朔雲連秦人骨肉皆爲土
漢地封疆已罷邊飲馬窟深泉動脉收羝沙暖草生煙
神京近在玄溟北九域開荒際幅員

還次桓州

塞雨初乾草未霜穹廬秋色滿沙場割鮮俎上薦黃鼠

獻獲腰間懸白狼別部烏桓知幾族他山稽落是何方
長雲西北天如水想見旌旗瀚海光

題齋壁

牧馬新來秣地椒街頭酒玉傾瓢羲和白日經天近
敕勒陰山度漠遙雨過忽然思御袂風清聊復快凌歊
他年續作灤陽夢萬里排雲遡沆寥

送臨川謝有源赴閩醫提領

一路青山荔子叢華山西望粵臺東家風蘭玉庭階上

官事參苓藥籠中
鷓首去乘潮浪白蠟房催薦酒醅紅
福州自是炎蒸少
臘雪飛花落半空

鄂掄圖

字克莊淮
西僉憲

題西湖亭子寄徐復初檢校

芙蓉花開一萬頃
錢唐最好是湖邊
曉風得酒更畱月
春水到門還放船
笙引鳳凰天上曲
賦裁鸚鵡座中賢
令人却憶徐公子
深閣焚香日晏眠


劉聞

字文廷安成
人國子助教

賦得石鐘二首送宋顯夫僉事之山南

雲垂蒼岵深月出湖水動旅思方渺然
噌吰發空洞悠悠湘靈感殷殷釣天夢
人在九江船餘音遠相送

蒼茫楚澤秋巖谷隱宮徵魚龍守軒轅
猿鳥識追蠡酒醒江南客月在船窗裏
佳期不可尋相思滿湖水



元音卷八

欽定四庫全書

集部

元音卷九

十

詳校官中書_臣丁榮祚

助教_臣常循覆勘

總校官降調編修_臣倉聖脉

校對官修撰_臣吳錫齡

謄錄監生_臣薛炳文

欽定四庫全書

元音卷九

張翥

字仲舉號蛺蝶晉寧人翰林承旨

送黃中王之慶元市舶

昔我遊四明壯觀溟海波褰裳寶山頂曙色寒嵯峨日
輪鎔生金涌出萬丈渦雲氣忽破碎朱光相盪摩決背
蓬萊宮攜手扶桑柯羣仙迎我笑佩羽紛傒傒颼風歔
驚潮騰擲鯉與鼉浮查徑可擘從此超天河精神洞百

靈上下煩撝訶歸來已十載遠夢時一過君家賢父兄
儒術傳世科薄言捧省檄舶署聊婆娑是邦控島夷走
集聚商舸珠香雜犀象稅入何其多權衡較低昂心計
寧有訛資閱須厯試壯圖詎蹉跎維君官事隙爲訪巖
之阿懸應仙者徒徃徃嘯且歌遐征渺不見空響遙相
和因聲兩黃鵠持我紫玉珂豈無滄洲興奈此塵劫何

題陳孝子傳後

昌化陳南仲幼失其生母王氏尋之六年後得之永

豐縣禮賢鎮之施氏永康胡石塘先生作傳

百丈山前妾辭主禮賢鎮中子逢母三十年餘一日同
白髮相看淚如雨阿嬈去時未斷乳兒壯得知心獨若
清湖老嫗天所畱逆旅主人神使語歸來桑竹溪之澚
婦前持觴孫起舞雙瓜生祥表秋圃豈待旌書動官府
吳人買妾紛莫數歲滿母歸遺子女巷南巷北不相覓
况復山川兩脩阻嗚呼千秋復萬古孝子之名昭寰宇
世上滔滔忘母人不愧唐昌一杯土

螢苑曲

楊花吹春一千里獸艦如雲錦帆起咸洛山河真帝都
君王自愛揚州死軍裝小隊皆美人畫龍韉汗金麒麟
香風搖蕩夜遊處二十四橋珠翠塵騎行不用燒紅燭
萬點飛螢炫川谷金釵歌度苑中來寶帳香迷樓上宿
醉魂貪作花月荒肯信劒戟生宮牆爛斑交合洗秋露
尚疑怨血凝晶光至今落日行人路鬼火狐鳴隔煙樹
腐草無情亦有情年年爲照雷塘墓

王貞婦

青楓嶺頭石色赤嶺下嶂江千丈黑數行血字尚爛斑
雨蕩霜磨消不得當時一死真勇烈身入波濤魂入石
至今苔蘚不敢生上與日月爭光晶千秋萬古化爲碧
海風吹斷山雲腥可憐薄命良家女千金之軀棄如土
姦臣誤國合萬死天獨胡爲妄遭虜古來喪亂何代無
誰肯將身事他主兵塵湏洞迷天台骨肉散盡隨飛埃
楓林景黑寒燐墮精靈日暮空歸來堂堂大節有如此

正當廟食依崔嵬君看嶧江之畔石上血當與湘江之竹淚痕俱不滅

重賦明山歌送胥式有儀還武昌

山式從其師曾堅子白讀

書處

盱母城南隱居者一生耕鑿盱南野何年移入明山來
築樓山顛雲在下環山小塢三十六中有清池蔭桑竹
日高塢口煙霧稍稍見行人出深谷池頭古井穿石空
絕底暗與江流通井中鯉魚長尺半人不敢取疑蛟龍

隱居何人曾子白誰其從者胥生式先生喜與山爲徒
意不在仙在樓居胥也來讀山中書溪翁野老時時一
相過有筐盛蕨兮有酒盛壺興酣題詩滿青壁墨痕入
石青模糊華蓋浮丘石門麻姑鄰峰近壑可遊行中山
之樂足以適吾軀生今掉頭不肯住京塵茫茫歲云莫
豈知卬亦愛山人未辨山肯得歸去曾先生幾時把袂
明山行洒掃樓上聽松聲黃精飽啖一千日飛上丹梯
朝玉京

息齋竹石古木爲會稽韓季博士題

上有歐陽原功承旨題

老竹葉稀多禿枝
新竹碧潤含幽姿
籜中龍子振春蟄
突出雷雨頭參差
傍蹲怪石石罅裂
裂處恍惚疑龍穴
山中有樹皆十圍
活榦撐青死槎折
霜皮食盡乾蘚文
半頂斬立雙桎分
最後一株身出羣
垂枝倒走陰崖雲
李侯標致不可得
小字親題別塗黑
縱橫不在摩詰下
蕭爽直與洋州敵
玉堂學士欣見之
濃墨大書真崛竒
森然一片鐵石筆
妙甚七字瓊瑰詞
此詩此畫今兩絕

把玩微風動毛髮只應真宰泣瑇瑁一夜山窗冷秋月

伍牧

宋將尹玉援常州戰死於此

苦戰勤王事精魂泣鬼雄壞城兵氣黑遺鏃血花紅故
老談亡國明時錄死忠長吟一搔首落日鳥呼風

題汪會語村隱居

聞道荆村僻幽居趣自成桑中豚甯晚芹外燕泥晴苔
石留僧坐山尊遲客傾憑軒久不到望得白雲生

題楊太史山居圖

湖上山居好奎題壓翠微煙霞改舊色林壑發清暉松
晚看書罷荷涼坐釣歸圖中有真趣須此挂朝衣

陪東泉學士汎湖

山靄忽空無春暉正滿湖船頭載家樂花裏駐行廚樂
任喧呼動歸從酩酊扶使君畱客意更爲倒金壺

送成禮部誼叔察訪守令河南山東

歷數開千載明良會一時朝廷嚴守令宵旰爲黔黎南
服方多故東州復阻饑郎官應簡拔使者出詢諮此命

於今重如君衆論推直承廉察往肯作畏難辭靈雨隨
華轂流風度綵旗草兼驄一色柳與轡同絲梁宋分淮
甸青齊並海涯政苛嗟虎猛民散念鴻離罷更寧勝任
姦貪只自私中年因雉見單父得魚知或有隳其職誰
能慎所司張弦從急緩朗鑒各妍媸治道誠先務皇心
實在茲俱爲良吏選足慰遠人思空闊青雲步孤高玉
樹姿暫傾冠蓋餞行赴簡書期事業懸鐘鼎光華映羽
儀歸來前席問請入史臣詞

送彭大年真人祀東海東嶽東鎮

國典崇常祀名山仰岱宗聖皇欽所遣使者肅惟恭禮
自唐虞秩神知造化鍾天門開巖嶭日觀上龍從零雨
行清道浮雲起溢胸宿齋分鶴帳朝享發鯨鐘吹溢安
歌進靈來衛仗從御香分晝靄佩玉響璫琤瑤美薦懷椒
糈精誠奠壁琮東流瞻鉅海列鎮到諸峰瀛島遙相望
仙人或此逢岳祗調虎豹水怪帖魚龍星墜祠光白煙
涵瑞氣濃振衣臨濬壑飛蓋拂長松庶物消餘沴洪河

復故蹤年祥報齊魯地寶出雷灘嘉澤羣方洽明時百
職供回車宜訪問弭節可從容世祚祈千億玄功贊九
重禁庭歸福處有待頌東封

上清薛茂宏虞內翰以鶴齋號之爲賦

羽人新得虞翁號歸築衡茅並翠微丹室有風鳴夜帳
斗壇多露濕秋衣畫中昨者薛少保華表他年丁令威
直儼身形煉相似玉笙吹上白雲飛

瓜州與成居竹王克純登江風山月亭

風起西津斷客艘
熊家亭上得憑高
雲移鳥影沉江樹
雨帶龍腥出海濤
開闢自天畱壯觀
登臨如我老英豪
放舟擬就金山宿
一夜清寒襲錦袍

登金山吞海亭了公請賦

危亭突兀戴鼇頭
俯視滄溟一勺浮
龍伯衣冠藏下府
梵王臺殿起中流
扶桑夜色三山日
灩澦江聲萬里秋
老我惜無吞海句
但磨嵯石記曾遊

寄成居竹隱君

青袍朝士困京華
此老蕭閒竹滿家
山壓窮愁詩強項
海枯渴肺酒槎牙
商巖未採芝如草
彭澤將歸菊有花
孤負江頭理漁事
短篷春雨夢溫沙

題唐子華畫王師魯尚書石田山房

秋水橋邊紅葉林
數家茅屋傍青岑
岡頭種玉朝煙暖
壠上鋤雲宿雨深
摩詰輞川宜入畫
少陵韋曲自成吟
束薪歲晚來同煮
應許山中道士尋

賦中書左曹小瀛洲

東曹地迴集名郎宛是仙家紫翠房
闔闔上通天咫尺蓬萊移出海中央
金波日暖浮鵝鵲玉樹春濃下鳳凰
幾度夢回清夜直此身如在五雲鄉

登六和塔

江上浮圖快一登望中煙岸是西興
日生滄海橫流外人立青冥最上層
潮落遠沙羣下雁樹欹高壁獨巢鷹
百年等是豪華盡怕聽興亡懶問僧

三月望日遊虎丘寺題小吳軒

海涌峯前雲樹盤
佛宮飛閣出巔巔
虎來古塚金精白
龍卧秋池劍影寒
禪老說空畱壞石
鬼仙題雨下虛壇
憑高不盡登臨興
更借西山晚翠看

題黃州管氏懷坡堂

玉局仙人雲錦裳
騎龍一夕下黃岡
我我冠蓋生陳迹
落落江山有耿光
謫宦六年名益重
懷賢千古意何長
君侯此舉誠佳事
未數儋州載酒堂

題舒魯存道元帥平師宗三州卷後

不用牙璋遠出師將軍馮軾定邊陲
陸焚酋爭歛金盤血漢使高懸玉帳旗
司馬文章傳太史武侯威略震南夷
只今父老蘭滄上擬刻寧蠻第一碑

次韻存道元帥師宗感時及陡遡山竦刀寨入

貢詩因送歸關戍

徼外頻驚羽檄飛將軍三起著戎衣
空山狐兔無藏穴平陸龍蛇有殺機
已見趙佗知漢德更令孟獲識天威
此行整頓蠻荒了箐雨瀘煙好賦歸

二月朔日登憫忠寺閣

百級危梯遡碧空，憑闌浩浩納長風。
金銀宮闕諸天上，錦繡山川一氣中。
事往前朝僧自老，魂來滄海鬼猶雄。
只憐春色城南苑，寂寞餘花發舊紅。

奉答新仲銘禪師

吳楓初冷鴈連天，夢在江南野水邊。
詞客欲歸嗟老大，美人不嫁惜嬋娟。
豺狼正爾當官道，龍象於今護法筵。
我識新公老禪衲，一鐙蒲室是真傳。

題金陵

運盡黃旗晉祚開
天星俄復坼三台
方驚掘地雙鴉起
卽見浮江五馬來
草暗離宮碑卧土
雨殘戰地骨生苔
當時一掬新亭淚
誰信清談自有才

送李孟端奉祀天妃祠北歸

萬里函香出漢廷
楚江南下越山青
祠光夜現天妃火
騎氣秋瞻使者星
三島鳳麟環碧海
九關虎豹隔青冥
君才宜掌絲綸美
爲述文章襲六經

王繼學自海南召還翰林再除南臺侍御

天上歸來錦作袍，幾陪春色醉宮桃。
碧海無山不戴鰲，卿月又臨仙掌動。
廣陵路接金陵近，擬拂塵衣望節旄。

寄別陳渭叟

空山花發春事幽，道人結屋居上頭。
杏子成林誰敢偷，金銀氣雜丹光現。
寄詩黃鵠一相別，獨立蒼茫歌遠遊。

虛齋贈四明王道士

高齋聞在荔枝林，曲几方牀宴坐深。
大道無形元寓器，至人於物不容心。
三山雲氣通寥泖，一室天光入照臨。
我欲壺中收藥去，石田瑤草共相尋。

吳江

坐倚風檣看太湖，波濤瀕洞半三吳。
寒通上界咸池氣，黑入中流水伯都。
雲暗蛟龍應起立，雪深鴻鴈自驚呼。
望亭有酒宵堪醉，買得漁家一尺鱸。

寄題杜原父懷友軒

尺五城南近世紛移家來並武夷君他年功業誰青史
此客山林自白雲石氣曉侵書幌濕溪聲時雜棹歌聞
故人已同棲約杖策行穿虎豹羣

贈馬易之

萬里征帆度越江茲遊奇觀世無雙海中蓬島金銀闕
天上玉堂雲霧窗吾道政須求柱石詩壇從此避旌幢
青林白谷歸休地懷抱因君得暫降

中秋對月時張外史有約以醉不赴

明月中天雲霧消酒醒涼思正飄飄星河不動秋空闊
鐘鼓無聲夜寂寥露下遠山皆落木風來滄海欲生潮
仙家玩事無緣到虛負瑤樓聽玉簫

梅雪齋爲茅山楊道士賦

雪樹生香滿佩巾紫霄最上集仙真苔荒鶴跡渾無路
花暗笙聲不見人瑤圃月寒通白曉丹臺雲暖駐長春
莫教流水山前去恐似桃花客問津

鳳山

衰草寒煙老木風南朝佳氣落秋空壁來山鬼遮秦使
盤泣銅仙別漢宮壞埒尚傳祠乙鳥荒池曾見射飛鴻
騷人自古多羈思長在登臨感慨中

冰蟾爲金齊賢賦

老蟾素魄稟金精千歲玻璃幻結成明水夜零陰燧凍
丹書秋滿肉芝生腹凝寒露藏虛白影入銀河浴太清
擬向姮娥乞靈藥與君騎向廣廷行

吳江王氏水雲深處

湖平天闊開詩境
宜著幽亭俯碧潯
閒許釣徒分半席
靜饒沙鳥占全林
青連河漢秋無極
黑入菰蒲晚易陰
更好扁舟明月夜
醉攜長笛寫龍吟

題上清張道士壺洲

錦水東頭觀闕青
仙家元不隔滄溟
鳳麟洲渚寒凝碧
雲霧衣冠夜降靈
金醴浸花畱客醉
玉簫吹月使龍聽
看君福地容蕭爽
長與曾孫宴幔亭

石頭城次薩天錫韻

陂陀石路帶城遙，古寺殘碑蘚半凋。
一自降王歸上國，空餘故老說前朝。
壞陵鬼剽傳金盃，畫壁仙妝剝鳳翹。
更欲畱連盡奇觀，夕陽江上又生潮。

見鴈

鴈行新自鴈門來，遠度平沙陣勢開。
光祿塞空霜氣冽，受降城廢水聲哀。
烏孫公主歌誰和，猿臂將軍射未回。
今日客中腸易斷，不須更上最高臺。

送式無外歸高麗

三韓山水有靈暉秀出斯人了佛機
獄寺禪餘畱偈別王城齋罷戴經歸
瓶收滄海降龍入錫度秋空近鶴飛
只恐故林雲卧後一鐙秋老木棉衣

送俞伯疇還淞東

四明遊客往京都旅舍青燈照影孤
家信幾年黃耳犬鄉心一夜白頭烏
却攜長鉞辭金水直挂輕帆過鑑湖
爲問蠡吾王太守別來安穩有書無

散木軒爲陳則虛高士賦

散木軒中一散仙形雖如槁氣蒼然路松政自爲名誤
社櫟還因不用全梁棟無心脚閱世山林有地可長年
碧窗日靜忘機處悟得南華第四篇

鐵笛爲孟天暉作

愛此輕圓鐵鑄成何須楚竹選孤生年多化作青蛇色
夜靜吹如彩鳳聲繡出碧花凝錯落冷涵金氣發鏗清
最宜攜向君山去一聽仙翁奏月明

壽岳齋傳左丞

六朝名德仰巍巍未許家園久息機霖雨帝方思汝作
衮衣人更望公歸南山一柱標中土左轄三星拱太微
欲向賓筵頌眉壽寸心遙與白雲飛

夏孝子

名永慶
定海人

翁已全生兒殞軀投文我欲詰天吳一時肝膽寧知死
萬頃波濤視若無骨塋夜泉鯨穴冷魂歸故國蜃雲孤
自今孝子流風在直與扶桑水到枯

台哈布哈

字兼善蒙古人南臺御史

賦得上林鶯送張兵曹

春日陽關道鶯聲滿上林來從金谷曉飛度玉樓陰柳
嫩難分色歌停稍辨音明朝空解語人去落花深

寄姚子中

懶趨青瑣備朝班焚卻銀魚挂鐵冠琪樹有枝空集燕
竹花無實謾栖鸞漢庭將相思王允晉代衣冠托謝安
聖世只今多雨露上林芳草似琅玕

春日宣則門書事簡虞邵菴

三月龍池柳色深
碧梧煙暖日愔愔
蜂粘落絮縈青瑣
燕逐飛花避綠沉
仙仗曉開班玉笋
雲韶春奏錫瓊林
從臣盡獻河東賦
獨有相如得賜金

春日次宋顯夫韻

帝城三月多春色
南陌風光畫不如
躑躅花深啼杜宇
鷓鴣灘暖聚王餘
玉樓似是秦宮宅
金水元非鄭國渠
處處笙歌移白日
揚雄空讀五車書

送趙常伯淮西憲副

東華晨霧正霏霏，使者分符向合肥。
封事尚留青瑣闥，蒙恩近出紫宸闈。
江涵曉日明樓堞，風引春雲上繡衣。
珍重故人千里別，綠尊須盡莫相違。

寄同年宋吏部

金鏡承恩對紫微，錦韉白馬耀春暉。
謾隨仙仗朝天去，不記宮花壓帽歸。
海國風高秋氣早，關河雲冷鴈聲稀。
嗟余已屬明時棄，自整絲綸覓釣磯。

上尊號聽詔李供奉以病不出奉寄

丹鳳銜書出內庭羽林環衛擁霓旌
千官拜舞開仙仗四海謳歌荷聖情
香霧細添宮柳碧日華遙射錦袍明
侍臣亦有文園病臥聽龍墀鼓吹聲

與蕭存道元帥作秋千詞分韻得香字

芙蓉宮額半塗黃雙送秋千出畫牆
簾底燕驚花雨亂樹頭蜂繞機塵香
巧將新月添眉黛閒倩東風響佩璫
歸去綠窗和困睡暫憑春夢到遼陽

絕句二首

繡簾鉤月夜生涼
花霧陰陰入畫堂
吹徹玉簫人未寢
更添新火試沉香

金吾列侍擁旌旄
五色雲深雉尾高
視草詞臣方退食
內官傳勅賜蒲萄

送王奏差調福州

春水溶溶滿鑑湖
蘭舟長護錦屠蘇
可憐走馬閩山道
榕葉陰中聽鷓鴣

雅勒呼

字正卿
扣琨人

和韻王繼學題冰壺四美人圖

彩毫將恨付霜紅，恨自綿綿水自東。
金屋有關嚴虎豹，玉書無路托鱗鴻。
秋期暗度驚催織，春信潛通誤守宮。
莫道銀河消息杳，明年錦樹又西風。

唐宮
題葉

舞鸞妝鏡拭鉛華，毫素無聲散彩霞。
夜月影寒分桂魄，春冰暈薄映桃花。
夢隨圖去憑青鳥，愁逐書來點墨鴉。
未得離魂如倩女，哀容先到君家。

崔薇
寫真

鄴宮簷瓦似鴛鴦
飄蘭渚鳴鸞去國遙
謾說君王留寶枕
不聞仙子和瓊簫
驚鴻易沒青天月
沉鯉難憑碧海潮
腸斷洛川東去水
野煙汀草共蕭蕭

洛神

珊樹交加玉樹重
鴛鴦難偶雪難容
共思漢事隨流水
各對吳儂戲遠峰
洛賦未成梁月墮
秋笳已斷塞雲濃
人間流落渾相似
猶勝淒涼泣暮蛩

二喬

寄南臺御史達兼善二首

昔年奎壁聚星圖
文彩虛稱二妙俱
祇有蒹葭依玉樹

初無蕙苾似明珠鳳凰臺上天光近烏鵲枝邊月影孤
壯志未消知已在敢煩音問慰窮途

白溝秋水帝城邊曉發河南使者船契闊山川將萬里
飄零歲月又三年雲間快覩冥冥鳳海上愁看跼跼鳶
經術匡君須我輩莫將離恨染華顛

送蘇伯脩御史之南臺

天上詞臣負莫雙乘驄此日莅南邦梅花路近宜逢雪
桃葉波平好渡江千里蒼生瞻繡斧十州使者避旌幢

同袍知己如相問已許閒身老北窗

汴梁懷古

花石岡前麋鹿過中原秋色動關河
欲詢故國傷心事忍聽前朝皓齒歌
蔓草有風嘶石馬荆榛無月泣銅駝
人間富貴皆如夢不獨興亡感慨多

酬江夏友人見寄

四海元龍眼界空平生豪習竟誰雄
早知黔首成秦贅悔學蛾眉入漢宮
曲水踈篁秋色裏小山叢桂月明中

故人歲晚能招隱，便買扁舟向漢東。

送趙秉彝親迎江夏之官臨川

婀娜新衣錦繡重，美人今夕過湖東。
一聲鐵笛千家月，十幅蒲帆萬里風。
孔雀畫屏占貴客，甘棠嘉樹詠先公。
墨池光動凌雲筆，春滿花封賦更雄。

送蒙古學教授之邛州

玉貫珠聯我國音，亂山深處變巴吟。
蒼虬挂屋寒筇瘦，白鶴懸巢古棧深。
座冷一毡知宦況，書來萬里見鄉心。

丈翁課最同文盛應譯嘉謨寄上林

二月梅

去年呵筆賦寒梅又見仙家二月開
不是東君畱客醉肯教神女逐春回
梨花院落爲雲妬柳絮池塘作雪猜
東閣如今清興減羅浮誰與寄香來

京師上元夜

華月澄澄宿霧收萬家燈火見皇州
天闌虎豹依霄漢人海魚龍混斗牛
公子錦韉鳴玉勒內家珠箔控銀鈎

道傍亦有揚雄宅寂寞芸窗冷似秋

送袁果山經歷之潮陽

潮陽贊府之官去猶是薇垣白髮郎天上故人懸夜榻
海邊候吏促春裝翠綃卷雨蕉花老火齊然雲荔子香
終日韓山對簾幙只愁簡牘破詩忙

留別克呼彥卿學士

十年帝里共鳴珂別後悲歡事幾多汗竹有編歸太史
雨花無迹染維摩湘江夜雨生青草淮海秋風起白波

明日扁舟又南去天涯相望意如何

李孝光

字季和號五峯永嘉人

題畫史朱好古卷

篇中叶韻四字

真宰簸縈籥笑睨造化鑪鼓金鑄賢智搏土作下愚畫
史天機精竊見造化樞盤礴解衣後當軒吮鉛朱沾塗
狡兔翰神氣如走珠手掣巨鼇簪痒癢生肌膚六丁拔
山來下無根與株海風吹之凝累累插江湖其中有幽
人傲兀不可呼已知畫手好令我心跼蹐五湖風雨夕

逕去理釣舟子技亦精絕白玉無疵瑕誰能薦天子遣
之畫雲臺一朝被賞識富貴真萌芽但訪青牛君乞受
黃金壺

大星

大星在天小星落城頭嗚嗚吹畫角津吏擊鼓河上船
行人草草居人憐男兒墮地弧矢願南北東西君莫怨
北風

蕭蕭北風吹客船月未出海天蒼然客子放歌脚叩舷

蕭臺東頭天裏海蕭臺西頭山刺天君行西過釣臺口
寄謝江邊老病叟坐看雲臺落人手丈夫豈敢愛微軀
奈此黃花一尊酒

茅山謠

道人兩鬢青如蓮大醉上山捫青天青天蕩蕩玉盤出
引手舉盤天上懸銀河傾倒桂樹影長風吹香落丹井
地上小兒沾玉馥白兔急搗玄霜熟惜惜仙家十二樓
夜半起拂跋烏浴手招茅君叫列仙帶劍上立紅雲前

茅君騎虎上天去道人乞我明霞篇

江山圖

元氣菌蠢生蛟龍銀河倒插金芙蓉九疑正在九州外
碧樹峭峭連丹楓上有萬古不死之明月下有掀天巨
浪之長江有客有客陸龜蒙往來江南成老翁天地無
家屢回首放船去踏江上之青峰船頭十日懸青雨風
拔銀山映東戶山隨沒鵲落中原水作巴蛇走全楚向
來英雄定黃土空遺絹素流今古天地一合如金甌萬

歲千秋奉明主

越上

賀家湖上又秋風放翁宅前東復東兩行雲樹忽遠近
十里荷花能白紅遊人濯足銀潢上越女梳頭青鏡中
我欲張帆上南斗扶桑碧海與天通

宿巢縣

旅食荆吳改歲年春風行路思綿綿青山故繞周瑜墓
明月猶窺亞父泉楚縣城荒餘畫角巢湖日落有歸船

天涯芳草萋萋綠想見登樓憶仲宣

送王伯循

使者樓船鼓三疊猶見車前白鷺翻莫嗔惜別把衣袖
他日爲誰拈酒醪龍蛇未蟄江水壯鴻鴈欲動秋風高
槐樹東頭讀書處更憶君家雙鳳毛

寄達兼善

城上烏啼欲閉門瀟瀟風雨近黃昏無端畫角連雲起
鐵鑄梅花亦斷魂

甘立

字允從
陳畱人

瑠林臺爲薛玄卿賦

西山有崇臺上與雲氣通仙人紫霞佩導以雙青童逍
遙琪樹林盤薄瑠華宮積石象玄圃連岑構空同纚纚
駐朝景泠泠度天風丹鳳刷儀羽絳節飄幢幢矯首不
可及滅沒凌飛鴻願言授靈藥與世無終窮

送客賦得城上烏

月落城上樓烏啼樓上頭一啼海色動再啼朝景浮馬

鳴黃金勒霜滿翠羽裘烏啼在故處人生多去留

晚出西掖同柯博士賦

薄暮出重闌逶遲望雙闕輦路猶輕塵上林已初月
悠文書靜去去車馬絕小草慙長松承恩總無別

送方叔高賦得長安道

灞陵橋上秋風早行人曉出長安道長安城頭烏正啼
長安陌上聞朝鷄征車遙遙行復止征馬蕭蕭鳴不已
將軍年少美且都黃金箭鏃雕玉弧未央前殿進書罷

諸生拜官辭石渠將軍歸去亦草草長安道邊人羨好
莫憐賈誼謫長沙不見馮唐禁中老

送多爾濟國王之遼東

奕世名王策駿功遠分茅土鎮遼東玉符金印傳孫子
鐵券丹書誓始終滄海斷霞連虎帳黑河飛雪暗琇弓
莫忘聖武艱難日四傑從容陟降同

郊祀慶成

圜丘親祀自吾皇夙駕鷹輿建太常冕服並行周典禮

樂歌不數漢文章清臺夜奏靈光紫溫室朝迎瑞日黃
今代侍臣多馬鄭明時應許議明堂

和宋學士晚出麗正門

暮光霞彩炫金題絳闕高居雉堞低上相樓臺連御苑
中郎車騎過沙堤皂雕孤挾凌雲翮紫燕雙翻踏雪蹄
回首上林涼月夜蕊珠多是鳳鸞栖

送閣學士赴上都

從官萬騎擁鑾輿東閣詞臣載寶書雨過草肥金絡馬

月明山轉紫駝車
龍庭日近瀛洲路
灤水天高玉帝居
明日仙凡便相隔
少年僚吏謾踟躇

古長信秋詞二首

缺月流光入綺疏
金壺傳箭夢回初
秦臺彩鳳無消息
桂影空閒十二除

輦路青苔雨後深
銅魚雙鑰畫沉沉
詞臣還有相如在
不得當時買賦金

吳王納涼圖

六月長洲水殿涼酒酣揮袖倚新妝芙蓉露冷秋雲薄
迴首西風響櫺廊

題柯博士墨竹

解谷春回落粉香拂雲和露倚蒼蒼月明後夜吹簫過
應是伶倫學鳳凰

鄧德良

送陳杏林赴潮州醫學教授

三千驛路上灘船九品醫官半百年藥市得錢添月俸

杏林收穀當公田北書漸覺江鴻遠南食初嘗海鱸鮮
不用越巫驅瘴癘家家傳取衛生篇

元音卷九

欽定四庫全書

元音卷十

余闕

字廷心
武威人

大口迎駕和觀應奉韻二首

晨光開翠峒廣路淨炎氛玉輶度流水華蓋爛垂雲既
御大宛馬還朝鯁海君都人望旌纛樂哉歌采芹

仗出彈箏峽川原鼓騎分天行肅大化時邁耀前聞整
蹕傳清道激吹入行雲日暮望雙闕草木亦欣欣

送王闕赴泗州打捕提舉

蒼茫吳楚會縱橫淮汭流春冰未泮渚芳杜已生洲揚
旌朱樓前張獵青山幽獻功效大兕亦致公子裘逍遙
足為樂何嗟晚不侯

待制張廷美姑阿慶詩

葭莢啓望國灼灼詠桃夭操觚染芳藻短髮未勝翹始
聆白雪句兼傳黃竹謠蘭萌初映砌春霜已降霄秋榛
覆故隴驚蓬颯迴颺金尊與瑤席庶足奉仁嬌

楊平章崇德樓詩

重城控秋塞丹樓耀芳甸
潁霞上氛氲蒼林下葱蒨長
河城邊急積岨窗中見遠雁
減居延行雲歸鄯善大賢
謝卿伯垂幃化鄉縣春蟲觸
寶瑟餘花飄玉研方從董
園樂陋彼歌梁轉伊予去山
澤寒齋秋草徧載覽登樓
篇益重臨淵羨

雲松樓

初日高樓上卷幔對黃山
黃山出霄漢爛漫發青蓮
參

差非一狀朝夕看屢妍九華承雙鳥敬亭附駢筵漫漫
雲幕嶺沈沈松覆泉清飈坐中起如聞帝女絃靜有幽
事樂動無塵慮牽逍遙悅心目茲道可長年

送劉伯溫之江西廉使得雲字

祖帳依仙館車蓋何繽紛使君驅駟馬衣上繡成文中
筵陳綺坐羽觴含郁薰情多酒行速意促歌吹殷況我
同鄉友同館復離羣朝陽麗神皋遙天澄遠氛回鑣望
雙闕五色若慶雲蒼茫歲年徂東西岐路分道長會日

遠何以奉殷勤惟有淩霜柏天寒可贈君

八月十五日處州分司對月

玄武夕始正華月升秋旻金波何穆穆綠桂滿中輪徘徊出西陸照耀此甌閩光流河宿隱氣隨商律振餘輝洞軒房紫蘭含微津皇天降嘉歲五政亦已陳樂哉一卮酒允矣同庶人

三月十九日郡學後亭燕盧起先使君

晨集歛江渚列席當蕙楊斯亭信顯敞翠嶺帶澄川潮

駕宜城步山積司空原青松紛被徑紅桃競發園衆賓
起為壽繇嚙出嬌絃中觴念遠離歲行已再遷漂萍有
時合行雲未見旋今朝不為樂來會知何年

賦得蛾眉亭送王德常御史赴南臺

江亭望華嶸望望似脩眉掃黛偏能巧含顰知為誰娟
娟微雨裏脈脈夕陽時千里乘驄去因之傷別離

有所思

春風起寒色春衣方重熏新裝捲羅幔清唱入行雲豔

色若流月芳澤謝蘭芬嬋娟信無度我思何在君

長安陌

浩浩長安陌瑤樓夾廣厦鴛鴦御溝上芍藥吹樓前駿
馬追韓嫣金尊約鄭虔功名有時有且得樂當年

伯九德興學詩

上德撫元運籲俊尹神京三雍蒸髦士五學訓齊氓登
歌陳羽縣鷹刀奉麗牲優游樂清化大道嘉方行

送孫教授

皇情重聲教宵裝爾載馳邊城南徼外禮殿左江陞捐
讓陳柳器弦歌蔭辟帷全勝宜春郭花落閉門時

賦得君子泉送彭公權為黃州教

君子沒已久遺井郡齋中本寓思人意兼全澤物功銀
牀駁故蘚玉甃落寒桐幾日趨官舍橫經誦養蒙

賦得春雁送司執中之江西憲幙

春風起蘋末旅雁尚回翔乳鴨嬌同唳新蒲短可藏應
懷洞庭水非避塞垣霜客路煩懷舊題書寄帝鄉

南歸偶書二首

帝城南下望江城此去鄉關半月程
同向春風折楊柳一般離別兩般情

二月不歸三月歸已將行篋捲征衣
殷勤為報家園樹緩緩開花緩緩飛

別樊時中廉使

光祿橋西惜解攜春星欲傍露盤低
自來宮柳多離思更著城烏在上啼

丁復

字仲容
天台人

與杜清碧先生四首

武夷山水先生宅山上松聲落醉眠不廢乾坤有清氣
至今岩壑出神仙南陽諸葛吟梁父西蜀揚雄草太玄
聖主如天明日月九重虛席正求賢

先生九曲溪邊住錦里風光太逼真當代如求董狐筆
名家政要杜陵人玉堂金馬頻催詔朱紱銀魚懶挂身
聞道少微星不夜已知江上有垂綸

五雲絳節下林丘
萬里銀槎上斗牛
聖代已興周禮樂
大儒宜法魯春秋
上林花霧冥冥濕
太液恩波浩浩流
清夜夢回高閣遠
一蓑烟雨泛漁舟

聖君虛席禮賢初
太史濡毫應詔餘
沙草縱肥金騷裏
宮花時落玉蟾蜍
晉朝人物推安石
漢代文章識仲舒
成業經綸有如此
人生須讀五車書

新寺和張仲舉韻

天宮兜率下崔嵬
結綺交疏面面開
地勢周圍龍虎國

鍾聲疎應鳳凰臺鼎湖仙去秋遺劍笠澤僧歸夜渡盃
千騎巡遊羣樂動五雲深處御香來

題方壺子天台圖送曾士安省親還上清

仙人飈車竟獨往我家天台不得還雲飛舍下兩白髮
桃熟溪頭雙綠鬟七十江上老為客夜半夢中無數山
更煩爾祖方壺子寫我與君劉阮間

與李五峯先生

雁蕩山前結屋牢先生欹枕聽松濤麒麟一出空祥瑞

鳳鳥孤飛惜羽毛
漢代文章遷史盛
晉時人物謝安高
懶將白髮供朝綬
縱有金魚換酒醪

九月一日遊昭亭

山色江光帶近郊
道旁楊柳舞寒條
半生九日黃花酒
多在西風白下橋
千里客游仍暮景
異鄉人事又今朝
老來未遣登臨懶
盡醉東家綠玉瓢

送僧歸廬山

廬山東南山木多
石梁顛倒挂銀河
仙燈夜半天紳落

佛屋春深海客過五老芙蓉還好在陶公楊柳定如何
布帆又起江湖興應道西風動薜蘿

吳師道

十臺懷古

姑蘇

百花洲上姑蘇臺吳王宴時花正開半空畫燭西子醉
三更鐵甲東門來吳波渺渺吳山簇不見嬌嬾倚闌曲
丹楓落月怨啼鳥碧草東風走驚鹿闔閭丘墓相連處

應恨夫差迷不悟，斷指千年血未乾。
遊魂夜哭臺前路。

章華

靈王傾國崇臺宇，按劍章華睨中土。
弁裳伏地走諸侯，鐘鼓凌空震三楚。
騁驕不畏伍子謀，落成乞與吳兵遊。
孤舟竟走江上路，塊土獨占山中愁。
十年霸氣絃蕭索，回首華容歸不得。
饑魂漂泊啼秋烟，細腰却舞新王前。

朝陽

神娥縹緲高唐上，楚宮樓閣森相向。
丹楓蒼桂擁孤闕，

白石清江簇連嶂行雲冥冥飛雨寒孤猿咽咽秋花間
翠鈿龍駕杳何處斷魂殘夢愁空山微臣宋玉誇能賦
當日襄王豈真過千古秋風恨未平高泉飛落三巴怒

黃金

昭王銳志移青社築土懸金奉賢者四方劍佩集強燕
千里風塵馳駿馬郭君自舉先羣豪樂生獨步超凡曹
酌恩一雪霸國恥建功獨倚雲天高君臣意氣千年少
落日荒涼沒秋草黃金買貴滿長安惆悵英雄布衣老

戲馬

項王數馬從東來意氣蹴踏全秦推入關不並沛公轡
還鄉却上彭城臺重瞳按劍風雲靡萬足騰空烟霧起
淒涼垓下泣名雕零落江邊餘數騎寄奴千載心爭雄
登高把酒臨秋風詐移晉鼎非男子君看百戰東城死

歌風

沛宮置酒君王歸酒酣思深風雲飛兒童環臺和擊筑
父老滿座同沾衣一歌豐沛白日動再歌淮楚長波涌

龍髯氣拂半空寒虎士心馳四方勇河山蕭瑟長陵荒
野中怒響猶飛揚高臺未傾風未息故鄉之情那有極

望思

桐人氣迫前星黯思子宮成翠華晚高臺有恨碧草新
大野無蹤金犢遠一朝弄兵兒罪輕百金鍾愛天倫深
戾園魂魄夜寂寂湖城風雨秋陰陰漢宮樓觀連天起
方士秉香召仙鬼望思望思終不歸茂陵老淚如傾水

銅雀

半空高棟翔金雀玉宸總帷塵漠漠西陵老樹暝色寒
長安殘枝春情薄曲終紅袖辭尊前簷傾斷甍飛人間
分香老淚恨不滅秋風吹入苔花斑漢家一片當時土
肯為奸雄載歌舞銷盡曹瞞萬古魂落日潼河咽寒雨

鳳凰

金陵王氣飛祥雲鳳凰臺上聲和鳴鳳來春日花冥冥
鳳去秋風荒草生嬌娥舞散高臺暮青山迥隔丹丘路
斜陽門巷語烏衣細雨汀洲飛白鷺江空天濶鳳影遙

謫仙吟斷誰能招六朝宮闕烟蕭蕭月明夜半人吹簫

凌歊

宋家天子遊南國紅粉三千臺百尺歌鐘激浪楚日白
簾櫳凝樹湘雲碧凌歊高宴金輿來侍臣狎笑朱顏開
臺城宮扉鎖花柳寄奴玉障生塵埃昏昏醉夢春風幾
不顧江東數千里酒罷歌闌帝業銷青山空映當塗水

韓中材

岳王墓

妖星墮地芒角赤龍劍悲吼風蕭瑟中原王氣挽不回
將軍一死鴻毛擲秦家小兒真戲劇播弄造化搖樞極
指讎為親忠為逆隻手上遮天眼力九闕茫茫隔天日
無由下燭臣愚直臣愚萬死不足惜國恥未湔猶憤激
古墳埋冤血空碧風雨年年土花蝕我恐精忠埋不得
白日英魂土中泣請將衰骨斲出荒苔痕獻作吾皇補
天石

鴻門宴

花膺繡膊帕抹額勇士如雲森劍戟沛公對酒顏如灰
主人重瞳光照席重瞳座上身如寄卮酒未吞心已醉
醉酣不辨真天人百萬貔貅眼中睡春融玉帳香風開
嗚嗚帳下箏琶哀目前等作萬口計軍聲四面歡如雷
沛公唯若非無意就中暗挈秦天地此時可想聽得異
四面軍聲皆漢騎

征婦歎

虎頭將軍眼如雷領兵夜渡黃河面良人腰懸大羽箭

遼東掠地遼西戰一紙紅牋寄春怨十年消息無歸便
日長花柳暗庭院斜倚粧樓倦針線心憶良人嗔不見
手擲金彈打雙燕無術平戎報明主恨身不是奇男子
儻妾當年未嫁夫請學明妃獻西虜

黃誠性

讀文山集

三百餘年樂育恩晚從科目得斯人崎嶇嶺海期年國
零落羶毛萬死身諸葛未亡猶有漢包胥欲泣更無秦

挑燈慷慨歌梁甫鬢髮蕭森愜鬼神

王思誠

字致道
兗州人

賦得雲夢澤送宋顯夫僉事之山南

兩儀開混沌二澤積泓渟
匯溢巴丘腹陂泔楚地形
龍蛇蟠窟宅蛟蜃駕空冥
餘潤蒸巫峽層波接洞庭
汀花迎日白岸草際天青
使節光卿月仙槎泛客星
扣舷歌楚些鼓瑟舞湘靈
憂世嬰多病傷懷憶獨醒
清風吹碧渚明月漾滄溟
迢遞山南道乘驄舊所經

程益

字光道
濟南人

賦得金盤露酒送宗顯夫僉事之山南

鳳城仙客來揚州便當解此千金裘
丹丘夜出瑪瑙窗
洞庭春泛瑤華舟
看花路入竹西寺
吹簫人倚橋邊樓
船頭對月且獨飲
錦袍明日金陵游

王廓

字元舉
彭城人
湖州經歷

小孤山

江上青山一劍孤
氣虹夜貫斗牛墟
寒藤古祠神所居

謾說彭郎迎小姑，佯言不經聽者愚。舉世孰與明其誣，
山下長江通蜀吳。飛廉怒鎖千舳艫，乾坤變色慘不舒。
竿摧纜絕愁萬夫，初疑破虜遇老狐。又訝伏波留賈胡，
陽侯負弩雄前驅。馮夷擊鼓嚴後車，六鼇掣釣軒蓬壺。
八駿按轡鞭龍魚，神靈怪駭千萬殊。總有健筆難窮書，
一官長沙賦歸與。三年卧病南陽廬，故交新貴一字無。
扁舟夢鱸松江鱸，行或止之不可虞。呼童取酒聊自娛，
短歌激烈驚樵漁。掀髯一笑誰和予，鄰商去住依祝巫。

盤餐拜祠檣上烏百錢之利衆所趨浪走不待晨雞呼
進銳退速中乘除未要冒險爭前途江上正自不我踈
我亦樂與江山俱安得匹素百尺餘他年寫我東遊圖

張九思

字思敬

公莫舞

鴻門壯士髮植蒲玉帳酒熱聲暗鳴六合殺氣鬱結甚
長鎗大幟懸於菟張筵賓戲稱大夫酒上亭長不敢醉
黃金鑠鑠劍交飛裂眚填人齒生蟲公莫舞收莫邪不

聞夜澤死長蛇神龍變化不可蔡徒勞殺戮人如麻起
來三吁碎玉斗一軍西望長咨嗟

吳浩

字養浩龍泉人丁卯進士

二月八日駕幸柳林

早步廊街曙色紅聖時蒐乘理車攻高駝載寶氎麗
馴象騰車翡翠重夾道香烟春郁郁接天御氣曉溶溶
亦知奏賦長楊近五彩光華起六龍

李澗

字國用瑞陽人入貢

過廬山

斜陽淡淡柳依依立馬橋邊客去遲
畫錦已成螻蛄夢
夜臺應媿鵲鴒詩
萍蘂豆粥無傳法
蒲扇桃笙有賤時
千載孝標裙帔恨憑誰箋寄故人知

臧夢解

送則平使安南

玉節金函志氣雄
紫泥猶帶朶雲紅
中郎笑攬皇華轡
南越懽迎御史驄
為說葵傾知向日
誰云草偃不從風

折衝尊俎吾儒事
佇看梯航萬國同

譚復

字見心
閩州人

寄玉筍劉師服道士

玉筍峯頭玉作人
梅花壇下讀丹經
曉分露水洗明月
夜掃雲洲拾落星海鳥
近傳鳬徑度泉琴
誤許鶴同聽
何當謝却塵中鞅
共倚松根斲茯苓

俞鎮

送錢伯全上春官

雲間薦鶚起翩翩瑞世文章得共傳
白璧一雙全肉好青錢萬選中方圓
九天宮闕龍飛日率土衣冠虎拜年
擢第大廷歸館閣細圖王會續新篇

奉贈紹興總管王叔能

蓬萊高壓水精宮牧守清明似范公
綠野犁鋤春雨外畫船簫鼓夕陽中
隄防地設三江險樓閣天開七郡雄
珍重能文王博士為磨貞石紀豐功

王瓚

字在中奉元
人河東僉憲

題赤壁圖

我昔南游過赤壁曾上磯頭訪遺跡吳魏勝負了無聞
一曲漁歌楚天碧黃岡遷客蛾眉翁道同北海人中龍
羈懷得酒逸興發扁舟夜泛空明中江山如許誰賓主
醉挾飛仙夢中語直將天地等浮漚三國周郎曾比數
神游八極空畫圖開卷彷彿瞻眉鬚清風千古凜如在
悠悠目斷江雲孤

林德陽

讀文山集

黑風夜撼天柱折萬里飛塵九溟竭誰欲扶之兩腕絕
英淚浪浪滿襟血龍旄戈鋌爛如雪孤臣生死早已決
綱常萬古懸日月百年身世輕一髮苦寒尚握蘇武節
垂盡猶存景卿舌膝不可下頭可截白日不照吾忠切
哀鴻上訴天欲裂一編千載虹光發書生倚劍歌激烈
萬壑松聲助幽咽世間淚灑兒女別大丈夫心一寸鐵

楊鵬翼

鞦韆

日轉華簷樹影偏謝家庭院簇神仙綵繩斜擘纖纖玉
畫板輕承步步蓮美玉未升雲漢上綠珠先墮綵樓前
不知小徑殘紅裏明日何人拾翠鈿

周伯琦

字伯溫號雪坡番
陽人江浙左丞

入居庸關

出關復入關五見月上弦草木雖未霜寒風已淒然岢
路何紆縈疊嶂橫中天上有太古石下有無底泉幽致

良足嘉萬雷柰喧闐馴象寶轡鳴紫駝錦幪鮮鐵騎簇
雲隊黃屋循星躔時巡謚風俗執法恭後先達官國同
休拔宅如登仙細民終歲勞輸轉百苦煎苦樂殊雲泥
使我中心悄偶經岩谷勝復憶江湖壖升高望白雲楚
天浩無邊吾師未休息敢賦歸來篇

龍虎臺

在昌平縣境北距
居庸關二十五里

巍巍百尺臺蕩蕩昌平平原隆隆鎮天府奕奕環星垣居
庸亘北紀隩區斂全燕蒼龍左蟠拏白虎右踞蹲斯名

豈易得天以遺吾元明明傳正統聖子及神孫巡歸遂
駐蹕衣冠照乾坤山川皆改容草木亦被恩章華民力
竭柏梁侈心存豈若因自然張設一旦昏雄偉國勢重
簡儉邦本敦年年舉盛典宮中奏雲門

貢師泰

字泰甫號玩齋宣城人江浙參政

雜詩四首

看月當看缺月缺終須圓賞花莫待開花開落還先靜
觀萬物理可以全吾天東鄰侈曼舞西鄰沸絲絃歡燕

猶未終飄忽如浮烟宣尼陳蔡間伯夷首陽巔斯人雖
已矣清風萬古傳

千金不為恩一語終感德所以古來士慷慨重相得睠
茲義利間誰能有真識張儀復連衡鄒生空伏軾魯連
不帝秦高論抗六國遂令千載下撫卷長歎息

疏林收霽靄方池含密陰坐深清晝冷餘花散鳴禽緘
情何所寄撫我綠綺琴世無鍾子期誰能復知音曲終
一長歎悠悠千載心

偃息北窗下好風從南來開窗延好風懷抱忽為開人
生如逆旅造化同嬰孩小知鬪蝸角營營真可哀是非
何足論客至且銜杯

題顏輝山水

蒼龍渡海成疊嶂劣窮西來勢何壯盪摩日月噓雲烟
回薄風霆起波浪懸流晝夜相舂擬恍惚銀河落天上
橋橫霞嶺類天台谷隱龍湫疑雁蕩若非華蓋及武夷
無乃仙都與秦望參差飛觀倚半空錯落長松高百丈

烟懸絕磴畏崎嶇路出平川喜夷曠野老朝耕屋角雲
漁翁晚釣籬根漲偶隨鶴舞抱瑤琴猶恐猿啼驚蕙帳
畫師盤薄精天機元氣淋漓歸意匠毫芒點染遠近間
咫尺卷舒千萬狀三年老我東海隅立馬看山每惆悵
麻姑敬亭曾見招何日相從脫塵鞅

題二馬圖

鐵喙騶連錢驄何年墜影江水中蒲梢西來八尺龍天
閑十二為爾空五花雲錦吹東風

送江西傅與礪赴廣州教授

買得吳船便欲東，更騎羸馬別諸公。
文聲久許江西盛，詩律因歸海外工。
人羨義陽封介子，客從秦時薦揚雄。
五羊城下南風起，茉莉花香荔子紅。

送顧仲莊之海北

釣龍臺下與君別，萬里東南何日還。
星斗動搖天在水，海門空濶浪如山。
珊瑚寶樹來三島，鸚鵡金籠出八蠻。
簫鼓船回應北上，鳳池春早佩珊珊。

送篤御史

萬斛龍驤海上回，除書忽降自天來。
紅蓮日轉神仙幕，翠柏霜飛御史臺。
已喜文章收美譽，還因綱紀得長材。
風塵滿目難為別，且盡江頭酒一杯。

送劉彥明從經略使還

經略江南開幕府，曾因三語辟劉郎。
千金海上求騏驎，五色雲間識鳳凰。
思入金莖秋滴露，行隨玉節晝飛霜。
還朝定上平南策，應從夔龍到建章。

送洪元成赴靜江治中

海上東風吹鬢毛
杏花開處雨蕭騷
薦書舊最司征考
宮錦新裁別駕袍
落日山城旌旆遠
拍天春水柁樓高
莫憐投老多辛苦
萬里行囊有豹韜

次韻李景儀治書

楊僕船歸百越平
捷書今喜出甌寧
秋高劍氣衝南斗
天近綸音動北溟
萬里聲名雙鬢白
百年文物一瓊青
珠璣忽向三山落
誰復歌詩繼魯垌

題張子固所藏鮮于墨蹟

一自昭陵藏墨本書名誰復更起羣忽傳河朔專行草
不讓吳興變隸分黃鵠夜深隨落月白鵝秋冷化孤雲
風流賴有張公子雪繭封題比右軍

題李則平憲副所藏息齋竹

滿川風雨長篴管吹作參差三鳳凰簾粉已翻鱗甲紫
墨花還染羽毛蒼春寒弱幹當軒潤日暮清陰入酒涼
便欲截筒鳴嶰谷却愁彈瑟望瀟湘

已陵女子韓希孟貞節

尚書子婦魏王孫清白傳家節更文諸將已捐南渡主
孤身猶抗拒來軍血書夜灑已陵月壯氣秋橫鄂渚雲
欲弔忠魂無覓處惟應瑤席從湘君

題淵明小像

竹杖芒鞋白鹿裘山中甲子幾春秋呼童點檢門前柳
莫放飛花過石頭

徐天逸

擬古三首

皎皎機上絲織為游子衣
遊子蕩風塵素衣化成緇
風塵不可避四顧將何之
豈不念潔白徒重墨子悲
勗哉加澣濯河水清且漪

娉婷閨中女天質知自愛
空懷蘋藻心日月苦行邁
蹇修意良勤遲遲如有待
未嫁庸何傷失身將重悔

婉婉自結髮伉儷情義深
夫征日易久魚雁成銷沈
自憐鏡中貌衰白將駸駸
有衣誰為熏有花誰為簪
顧影

雖無儔秉心猶斷金青天懸明月照影不照心

段天佑

字吉甫河南人江浙提學

送妓入道

歌舞當年第一流洗粧今日別青樓便從南嶽夫人去
肯為蘇州刺史留琳館月明簫鳳下瑣窗花老鏡鸞收
却憐愁絕潯陽婦嫁得商人已白頭

吳漳

字楚望

題南陽諸葛廟

劍江流水綠沄沄五丈原頭日又曛
舊業未能歸後主大星先已落前軍
南陽祠廟荒秋草西蜀關山隔暮雲
正統不慚傳萬古莫將成敗論三分

桂元

字師善
慈溪人

和王守之斷腸曲二首

翩翩白馬垂楊陌千金結交五陵客
白苧細褶玉繫腰迎風葉葉衣袖飄
青樓夜夜偎香玉錦帳殷紅射銀燭
蘭房寂寞瑣窗春一月不動羅幃塵
昨宵醉歸扶不起

天明又入長安市

右蕩子

桃花夾隄春水滑棹歌三疊行舟發行舟去去東復西

幾度桃花二三月花前一別一回老相思日多歡樂少

君重黃金輕別離黃金買得少年時

右商人婦

宋无

字子虛吳門人

公莫舞

公莫舞公莫舞鴻門王氣歸真主何人睚眦赤龍子手

循玉玦目相語令公莫舞公楚舞劍光射日白虹吐人

發殺機天不與撞斗帳中咲亞父霸業明朝棄如土

妾薄命

雲母屏琢春冰蛟女織綃蟬翼輕比妾妾薄命比君君
薄情紅綿拭鏡照膽明還疑妾貌非傾城傾城從來有
人妬况復君心不如故故人心尚峰九疑新妾那能無
故時補天天不高填海海不深不食蓮葍不知妾心

烏夜啼

露華洗天天墮水燭光燒雲半空紫西施夜醉芙蓉洲

金絲玉簧咽清秋
鼙鼓鞭月行春雷
洞房花霧酣不回
宮中夜夜啼栖烏
美人日日歌吳歎
吳王國破歌聲絕
鬼火青熒生碧血
千年壞塚穴狐兔
烏銜紙錢挂枯樹
髑髏無語滿眼泥
曾見吳王歌舞時
烏夜啼啼為誰身
前歡樂身後悲
空留琴瑟傳相思
烏夜啼啼別離

彭炳

字元亮
武夷人

湘中曲

龍挾天河墮江渚
天子騎龍上天去
轟轟藏劍鑿黃雲

日落蒼梧一杯土兩鳳追天住湘浦紅淚湘筠滿秋雨
青山九點又春歸花落無人見韶舞

淵明辭

醉倚蒼江看落花阿舒扶上短轅車河山萬里皆劉裕
五柳春風自一家



元音卷十